

Pol-ate kaapiya nyendoos la vu Timoti

1 ¹“Sa Pol, ond Anutu sen hako yiyi lom-ato, yuuh Yesu Kalisi sen yiyi monatung mengg in yii-to, ond yuuh lanêêl-ambe saatu Yesu Kalisi-te sinaale.

²“O Timoti, sa kaavu kaapiyaa-jo laas vu hong in gawii-having Yesu be gatu sa noongg keen. Aamangg Anutu yuuh yate Omaaho Bop Yesu Kalisi lambiing samu samu osin ka pasiv naas mando gaving hong-ambe galompayo nanjip melaas.

Yiyi oo daanggôl vakasin tatuhin

³Bôôy sala in nambe ana Makedonia de saanêêl vu hong-ato, ond yik gêên sa naanêêl vu hong jesin naah naambe goo mando Epesas in nambe onaanêêl niwêêk vu hil vaalu naambe sil-ame taahu hil hôôk tanasin tatuhin jesin naah e. ⁴“Tonde sil gavuu vakasin mali-malis na, osin sil gavuu himbop bôôy-ate vakasin vaha vaha ngeeyaataa-ju na, in kakook nambêênju nawiing-ambe hil akand nala ngeey, de me-nawiing in nambe sil lambiing gaving Anutu be sil sapa hôôk ka le. ⁵“Yik saanêêl vakasin-anjo in nambe sil sapa hôôk ond mem sil alondpayo le nikaapiik-ande va nipaya me-le nanjip hôôk sil alondpayo be danjingin sil e, nganjo le lambiing gaving Yesu osin londpayo doos, le mem ahend e gaving Anutu osin omaahonôn keen. ⁶Hil vaalu ond laloh mop paya be lala danggwang taavêêt om yoo mondakasak vakasin mali-malis amu. ⁷“Lawiingin nambe daatu yêêv-ambe taahu hil hôôk Mose-te tanasin, lemu sil ond sil doosin vakasin sen dakasak-anju de me-lalak tanasin sen davu tatekin-ato danggakook ani having e.

⁸“Yalak ni nambe omaaho ti taahu hil hôôk Mose-te tanasin nohvu Anutu ka ond mem nivasa. ⁹Lemu yoo jak ni gaving naambe tanasin ond me-neep in nambe taato mopaatôôv vu hil anivalok e, nganjo neep

^a 1:1 Kol 1:27 ^b 1:2 Sin 16:1-3; Tit 1:4 ^c 1:4 1Ti 4:7; Tit 1:14 ^d 1:5 Lom 13:10

^e 1:7 1Ti 6:4,20; Tit 1:10 ^f 1:8 Lom 7:12,16

in taato mop vu hil sen me-dahulis tanasin baambuu-to osin kalêêsin ambu-so, tonde hil sen daluuh damind vu Anutu, de hil sen dawiiing va nipayaa-to, de hil sen dayi va nivasa yuuh ame nambe va malis-ande sil oo davu sapa hôôk va voon-ate muu-to, tonde hil sen dayiis maandin ayuuh taandin dayimb-ato, osin hil sen dayiis hil vaalu dayimb-ato. ¹⁰ Tonde hil baayamb osin moow-aso sen dahôôv moow ango nambe sen vêêh-ato, de hil sen dahôôndak

omaaho ango in nambe gako mone jak-ato, tonde hil sen davu tatuhin-ato, de hil sen davu tatuhin-ambe davu taato namand lak baandonii-to, osin hil sen dawiiing va vaalu pin sen me-neep lohvu tanasin keen-ato. Ke, tanasin neep in taato mop vu hil nambêênjo.

¹¹ De tanasin keen-ato ond neep hôôk banye nivasa sen Anutu vu vu sa in nambe sa naanêêl langaah-ato. Banye nivasaa-jo nêêl vu yiy nambe Anutu omaaho nikaapiik osin ka vasa danggakook yi.

Pol aka vasa vu Anutu in Anutu ka pasiv in yi

¹² Yate Omaaho Bop Yesu Kalisi yoo vu niwêêk vu sa, in ka vu nambe saalohvu nambe aambiing yite kul ondeey yoo hatung sa hôôk kul-anjo, om sa kangg vasa vu yi. ¹³ Keen, bôôy ond sa naanêêl yi pale osin sa monaawiiing nindanjeen vu yite hil-ambe sa laanggôôl sil lôôt, le ma de Anutu ka pasiv in sa, in same aawii-having Yesu Kalisi le, ondeey sa doosin va sen saawiiing yi payaa-to danggakook. ¹⁴ Yik yate Omaaho Bop yoo wiing samu samu bopaata lôôt vu sa be mem saawii-having Yesu Kalisi osin sahengg having yi lôôt.

¹⁵ In Yesu Kalisii-ju lukalaam voon in nambe nôôh yiy hil anipayaa-jo vêêl in va nipaya. Vakasin-anjo yoo keen lôôt, om hil pin oo gango be lambiing gaving. De hil dawiiing va nipaya, le sak, sa omaaho nipaya savok hil pin. ¹⁶ Lemu Anutu yoo ka pasiv in sa in nambe Yesu Kalisi taato naamunggin lak omaaho nipaya valok saa-jo naambe me-ahekalin vu sa pavis e, nganjo yoo hanggin sa lôôt in nambe saanggilin naah vu yi, in naambe hil pin sen le lambiing gaving vu taamusin-ato ond lanjji be lanjji yite samu samu ni, tombe mem sil mando metumin danggata osin danggata. ¹⁷ Omaaho lulemak danggata-têênju me-le jimb e, tonde hil-ame lalohvu nambe lanjji mend ak yi le. Yi timu Anutu keen, om yik banye osin yite nikaapulisi naatu bopaata lôôt-ambe nanjip danggata osin danggata. Keen.

^g 1:10 Tit 1:9 ^h 1:11 1Ti 6:15 ⁱ 1:12 Sin 9:15; Gal 1:15-16 ^j 1:13 1Ko 15:9-10; Gal 1:13

^k 1:15 Luk 15:2; 19:10 ^l 1:17 Lom 16:27

Timoti yoo biing niwêêk lak Omaaho Bop-ate ngaamong

¹⁸ "Noongg Timoti, saanêêl tanasin-anjo vu hong in nambe osamu lôôt, in sa kangg vu vakasin sen hil lanêêl langaah ak hong bôôy nambe gale gambiing Anutu-te kul anivasaa-to. Om yik gakam bu vakasin-anja be kaandu hong in goo gambiing niwêêk ak Omaaho Bop-ate ngaamong. ¹⁹ "Tonde mem gambiing gaving niwêêk-ambe galompayo nanjip nikaapiik, de va nipaya me-nanjip

hôôk galompayo be danjingin hong e, in hil vaalu me-lawiingin nambe londpayo nanjip nikaapiik e, nganjo lawiing va nipaya, om sen lawii-having munggin-ato ond laluuh damind vu be lawiliyak lôôt. ²⁰ "Haimenias ayuuh Aleksanda lawiing paya nambêênjo, tombe saavu yuuh lalukala Saalang nama in nambe yuuh lanjak ni be yuuh akand bu vakasin nivasa, tombe mem yuuh-ame daanêêl Anutu pale jesin naah e.

Yaanohak vu Anutu in hil pin

2 ¹ "Sa naanêêl vu hong e, naambe ham anohak vu Anutu in hil pin. Yik ham kataangg Anutu hôôk lohakin-ambe ham naapêêlis na vu yi in nambe dôôvu sil. ² Tonde ham akam bu lulemak-aso osin hil sen latu yêêv-ato pin hôôk lohakin gaving, in naambe sil ganggin yiyi nivasa be mem yiyi mando nivasa osin yalonggpayo melaas, tombe mem yaambiing va nivalok keen sapa Anutu ka. ³ Yaanohak naambêênja ond mem nivasa, tombe yik yate Anutu sen nako yiyi naalom-ato ond ahe naving lohakin nambêênja. ⁴ "In Anutu nawiingin nambe gako hil pin lanom vu yi be lanjak vakasin keen-ato danggakook ani. ⁵ "Anutu timu nando, tonde omaaho timu naale Anutu osin omaahonôôn lavuun ond Yesu Kalisi. ⁶ "Ond yik yoo vu yi la osin doos-ambe yimb in nambe baanggo hil pin nom, tombe manyinjo taato Anutu-te ahe havingin langaah hôôk busin sen Anutu yoo hatung-ato, nambe wiingin nambe gako hil pin nom. ⁷ "Ondeey Anutu yoo holin sa be saatu sinaale osin omaaho sen sa naanêêl yite vakasin-anjo langaah-ato. Same navu tatuhin e, nganjo saanêêl keen nambe yoo holin sa in nambe sa tatekin Anutu-te vakasin keen-anjo vu hil vaalu sen sil-ame Yudaa-to be lambiing gaving.

Vakasin lak moow ayuuh vêêh sen dasupin in nambe lanohak-ato

⁸ Saawiingin nambe moow-aso vu taaku pin gavuuu londpayo nivaane osin vakasin papenggin na, de

^m 1:18 1Ti 4:14; 6:12; Jut 3 ⁿ 1:19 1Ti 3:9 ^o 1:20 2Ti 2:17-18; 4:14-15; 1Ko 5:5

^p 2:1-2 Ep 6:18; Pil 4:6 ^q 2:4 Esi 18:23; 1Ti 4:10; 2Pi 3:9 ^r 2:5 Lom 3:29-30; Hiblu 12:24

^s 2:6 Gal 1:4 ^t 2:7 Sin 9:15; Gal 2:7-8; 2Ti 1:11

yoo londpayo nikaapiikaanôôn, le mem balaah namand jak-ambe lanohak.

⁹“Tonde vêêh-aso ond yik lanjop lolop ayuuh ame nohvu sil-ambe lung, de sil-ame gatee sil ak-ambe lambunak sil alund osin nind naavi jak kukum amengali osin gool amengali, de tôômb amengali sen daanggo lak mone bop-ato le, malis. ¹⁰“Nganjo vêêh-aso sen danêêl nambe Anutu-te nondinaavêêh sil-ato ond sil oo lambiing kul anivasa vaha vaha, ond mem silate kul anivasaa-ju tu silate vunakin amengali keen. ¹¹Vêêh-aso yoo daanggôôl sil lôôt-ambe sil lavand nama, de sil gango tanasin amu be daatokak danggakook. ¹²“In sa nimbaya nambe vêêh ti me-taahu hil hôôk tanasin e, de vêêh ti me-naatu yêêv-ambe ganggin moow-aso le, malis, nganjo vêêh-aso yoo mando lavand masin. ¹³“In Anutu samu Adam munggin le mem samu Eva taamuyin. ¹⁴“Tombe Adam-ame wii-having vakasin tatuhin e, nganjo Eva mu wii-having vakasin tatuhin-ambe kalêêh Anutu lava. ¹⁵Om naambe vêêh sen dawii-having Anutu be ahend monaving hil, de sil latu vaambuung-ambe mondalakin sil in va nipayaa-to, ond Anutu le dôôvu sil hôôk sen dako noondin-ato be gako sil nom.

Vakasin lak yêêv-aso sen danggin hil bel-atêêto

3 ¹Vakasin-anjo keen lôôt, naambe omaaho ti wiingin nambe naatu yêêv-ambe ganggin hil bel-ate, ond manyinjo wiingin kul anivasa ti ²“om yêêv-anju yoo ganggin yi nivasa, de me-biing va nipaya ti le. De gako vêêh timu, tonde yoo jakin yi in va nipaya be sapa hôôk kakook anivasa mu be biing va nivasa pin, de yoo samu vaatêêvak-aso nivasa, tonde tatekin tanasin nanjip langaah lôôt vu hil. ³Me-naanum bel-ambe lukook biing paya le, osin me-biing ahekali pavis e, malis. Nganjo yoo naalum melaas vu omaahonôôn, yik omaaho vakasin melaas, de me-ka bu mone lôôt e. ⁴Yoo ganggin vane gaving noondin nivasa, de biing-ambe noondin oo nanyend vuun in lava, be gako yi jak. ⁵In omaaho sen me-nanggin vane having noondin anivasaa-to ond me-lohvu nambe naatu yêêv-ambe ganggin Anutu-te hil bel-ate le. ⁶Tonde hil bel-ate moos ti ond me-naatu yêêv-ambe ganggin hil bel-ate le, in le gatee yi jak atombe Anutu gatiy yi na gaving Saalang. ⁷“Nganjo hil bel-ate osin hil alundoos-ambe sil pin dako hil bel-ate ti haale lak, ond mem omaahôô-ju naatu yêêv-ambe ganggin hil bel-ate, in hil-ame le daanggôôl yi be lopayo nimeen lôôt-ambe dukana Saalang-ate govak e.

Vakasin lak hil bel-ate kul vaha-so

⁸Hil bel-ate kul vaha-so ond sil mando nivasa nohvu hil gako sil jak, de sil-ame dalaand salak e, tonde me-daanum bel lôôt e, osin me-lambiing

“ 2:9 1Pi 3:3-5 √ 2:10 1Ti 5:10 ∞ 2:12 1Ko 14:34 × 2:13 Jen 2:7,22; 1Ko 11:8-9

√ 2:14 Jen 3:6,13; 2Ko 11:3 ∑ 3:1 Sin 20:28 ∆ 3:2 Tit 1:6-9 ∂ 3:7 2Ko 8:21

mend nôôn in mone le. ⁹Sil alondpayo yoo nanjip nikaapiik, tonde Anutu-te vakasin keen sen tok laam langaah gêên-ambe lawii-having-ato ond yoo daapuvu niwêêk. ¹⁰Om ham oo sahi sil naamunggin e, naambe hil-ame lanêêl vakasin ti lak sil e, in me-lawiing vati paya le, ond mem sil daatu hil bel-asote kul vaha. ¹¹Tombe yik vanêêndin ond sil oo mando nivasa nohvu hil gako sil jak, tonde sil-ame daanêêl vakasin anipaya jak hil noh nanye le, sil oo lanjakin sil in va nipaya be lambiing va nivasa mu nohvu busin pin. ¹²Hil bel-asote kul vaha ond gako vêêh timu, de yoo ganggin vanêêndin gaving noondin osin yite hil pin nivasa. ¹³In hil sen latu hil bel-asote kul vaha nivasaa-to, ond sil e gako haalend nivasa, tombe mem lalohvu nambe daanêêl Yesu Kalisi-te banye nivasa sen yaawiihaving-ato langaah niwêêk lôôt.

Anutu-te samu samuu-to danggakook bopaata lôôt

¹⁴Sa kaavu kaapiyaa-jo laas vu hong ond saawiingin nambe anaas pavis vu hong, ¹⁵le naambe same anaas balup vu hong pavis e, ond yik vakasin-anjo le taato mopaatôôv in nambe ganjak ni naambe yiy sen yaatu Anutu-te hil-ato ond yiy mando nivasa javuh ti be yiy sapa mopaatôôv naambêênjo. In Anutu-te hil ond manyinju Anutu metumin-ate hil bel-ate sil, tombe sil lalohvu ngaandiin aniwêêk naale be napuvu vakasin keen-ato. ¹⁶Keen lôôt, vakasin sen Anutu ka vu be nêêl langaah vu yiy-ambe yiy navu sapaa-to ond danggakook bopaata lôôt. Vakasin-anjo nambe,

“Tu omaahonôôn keen-ambe taato yi laam langaah, de Vavi Vaambuung oo tatekin yite danggakook nambe yoo lohvu, tonde angela layi mend ak yi. Yite vakasin la lohvu omaahonôôn pin-ambe hil vu voon lawii-having yi, tonde Anutu hako yi be la baandoni osin nikaapulis.”

Tatuhin ambu-sote vakasin

4 ¹Vavi Vaambuung nêêl langaah vulôôt nambe vu busin taamusin e hil vaalu le galuuh damind vu vakasin keen sen lawii-having-ato, de sil e nanyend vuun vu hil tatuhin ambu-so lavand-ambe sil sapa hôök mamu nipaya-sote vakasin. ²De mamu nipaya-sote vakasin-anju ond hil tatuhin ambu-so le daanêêl, tombe sil e tatuhin ham naambe silate vakasin-anju ond vakasin keen, le ma. Nganjo va nipaya yoo wiliyak sil alondpayo lung la, om sil-ame lalohvu nambe lanjak va nivasa osin va nipaya ni le. ³Hil-anju le daanêêlin naambe moow ayuuh vêêh-ame gako sil e, tonde daanêêlin vanôôn vaalu naambe hil-ame lanja le. Le me-

^c 3:11 Tit 2:3 ^d 3:15 Ep 2:19-22 ^e 3:16 Jon 1:14; Mak 16:19 ^f 4:1 2Ti 3:1; 2Pi 3:3; 1Jon 2:18; Jut 18 ^g 4:3 Jen 9:3; Lom 14:6; 1Ko 10:30-31

lohvu le, in Anutu yoo hatung vanôôn ayuuh amêê-ju in nambe yiy sen yaawii-having-ambe yalak vakasin keen anii-to, ond yaanohak osin yiy naapêelis e mem yangga. ⁴^hIn va pin sen Anutu hatung-ato ond nivasa, om yame aambu vaambuung in e, nganjo yiy gako be yiy naapêelis na vu Anutu, ⁵in Anutu-te vakasin having lohakin nawiing-ambe Anutu nayi va sen yiy nahaa-to nambe nivasa.

Timoti yoo naatu Kalisi-te kul vaha nivasa

⁶Naambe onanêel vakasin-anjo vu Omaaho Bop-ate hil ond mem gatu Yesu Kalisi-te kul vaha nivasa, in vakasin sen yaawii-having-ato osin tanasin keen sen onavu sapaa-to, ond navu niwêek bopaata vu hong. ⁷ⁱDe vakasin mali-malis sen nôôn maa-to ond onggaluuh damim vu, de goo gambiing va sapa Anutu ka niwêek lôôt. ⁸^jKeen, yiy navu taahu yiy naavingg hôök kul, ond manyinju lohvu nambe dôôvu yiy pasivdaka mu, nganjo yaambiing va sapa Anutu ka, ond mem lohvu nambe dôôvu yiy lôôt, in yoo lohvu nambe dôôvu yiy-ambe yiy mando nivasa peey-anjo, tonde yik yoo le

dôôvu yiy-ambe yiy mando metumin vu taamusin gaving.

⁹^kVakasin-anjo yoo keen lôôt om hil pin oo gango be lambiing gaving. ¹⁰^lNambêênjo ondeey hey naawiing kul bopaata lôôt, in hey oo monatung mengg in Anutu

sen omaaho metumin danggakook-ambe nahôôvu omaahonôôn pin-ato, tonde yik yoo nahôôvu yiy sen yalonggpaya la timu vu yii-to lôôt-ambe yale mando metumin gaving yi danggata. ¹¹Om goo naanêel vakasin-anjo vu hil, osin otaahu sil in nambe sil taamuyin. ¹²^mKe, onaahen maanggêem daka, lemu hil-ame lanjji hong naambe va malis e. Yik goo gambiing va nivasa hôök Kalisi-te hil amend, in lanjji hong-ambe sil sapa hôök ovaham. Ombakaas nivasa, osapa mop anivalok, gahem gaving hil osin gambiing gaving Anutu keen, tonde gambiing va nivasa mu. ¹³Goo mongganggin sa in sale anaas balup vu hong, om omonaasevin Anutu-te vakasin vu hil, osin gambu kôôvu sil, tonde goo motaahu sil lôôt. ¹⁴ⁿDe Anutu vu niwêek kul-ate vu hong hôök busin sen hil lanêel Anutu-te vakasin langaah-ambe himbop-aso lambe namand lak hong-ato, ond game gavuu niwêek kul-atêênja na le. ¹⁵^oGamem oo sapa kul-anjo niwêek-ambe gambiing nohvu busin pin, tombe mem hil pin e lanjji gate kul naambe gatu omaaho niwêek ak. ¹⁶Goo ganggin hong, de goo ganiwêek-ambe otaahu hil hôök tanasin jak busin pin. Ke, gambiing naambêênjo ond mem ohako hong laah vu Anutu, tombe yik ohako hil sen dango olavam-ato lalaah vu Anutu having.

^h 4:4 Jen 1:31; Sin 10:15 ⁱ 4:7 1Ti 1:4; 6:20; 2Ti 2:16 ^j 4:8 1Ti 6:6 ^k 4:9 1Ti 1:15

^l 4:10 1Ti 2:3-4 ^m 4:12 Tit 2:15 ⁿ 4:14 2Ti 1:6; Sin 6:6; 8:17 ^o 4:15 1Ti 5:22

Yiy samu hil ak vakasin anivasa

5 ^{1P}Game patupak ak himbop ti le, malis. Yik goo naalum bakaas osin vakasin melaas amu vu yi naambe sen onakaas melaas vu mom-ato. Tonde osamu maanggêem-aso, yik naambe sen onavu samu halim-asôôto. ²Tonde osamu vêêh bop-aso, yik naambe sen onavu samu tam-asôôto, tonde osamu vехаavu-so, yik naambe sen onavu samu vangaam-asôôto, de gakam-ame bu va nipaya ti le.

Vakasin lak vехаahôôv-aso

³Ke, tonde vехаahôôv sen yoo timu nandôô-to ond osamu yi nivasa. ⁴Le naambe vехаahôôv ti noondin me bundin dando, ond yoo lanjak ni vanuh naambe silate kul nyendoos-anjo nambe sil oo ganggin maandin ayuuh taandin nivasa dukanaah nyevahaan, ond mem Anutu le ji nivasa. ⁵^qNaambe vехаahôôv ti yoo nando monativak, ond vêêh-anjo lopayo yoo nala timu vu Anutu, tombe langaah-ande busin ond yoo navu kataangg Anutu be nalohak nalak busin pin. ⁶Le naambe vехаahôôv ti lopayo yoo nala vu va naavi-te mu, ond manyinju nambe sen yimb lung laa-to. ⁷Om goo naanêêl tanasin-anjo vu vехаahôôv-aso in nambe sil oo ganggin sil nivasa, de me-lambiing va nipaya ti le. ⁸Omaaho ti me-nayi yite hil anivasa le, osin me-navu samu mangganaan ayuuh tangganaan osin halindin-aso sen sil dangga timuu-to le, ond haluuh dami vu vakasin sen wii-having-ato lung la, tombe tu omaaho nipaya lôôt-ambe yite nipaya savok hil sen sil doosin Anutuu-to silate nipaya la.

⁹Okaavu vехаahôôv haalend hôôk kaapiya, yik sil sen silate ta doo-yaal lung laa-to, tonde yoo lalak vu moow timuu-to. ¹⁰^rOnd vехаahôôv sen wiing kul anivasa vasa be haale neep, yik vêêh sen yoo hanggin noow-aso nivasa, tonde nako vaatêêvak-aso lak, de nako Kalisi-te hil ak, tonde nahôôvu hil paya paya-so, tonde wiing kul anivasa vaha vaha osin lopayo doos, ond vêêh naambêênjo ond mem okaavu sil haalend dukana kaapiya.

¹¹Tonde sim vехаavu-so sen layêêndin layimb-ato ond game kaavu sil haalend hôôk kaapiya le, malis, in sil alondpayo le biing navu navu naambe lanjak vu silate moow ango naah, tonde sim sil gavuuuh Kalisi, ¹²in sil e galuuh damind vu vakasin sen lanjôôy bôôy having Kalisi nambe sil oo mando naambêênjo in mondambiing yite kul-ato. Ke, sil galuuh damind naambêênju ond nipaya nyevahaan neep vu sil. ¹³^sTonde va sen dawiing-ato ango having nambe dawiing paling-ambe yoo mondatup hôôk bayêên ti ti pin. Le me-dawiing paling timu le, nganjo dahôôndak omaaho ango-te vakasin-ambe yoo lala danêêl la

^p 5:1 Lev 19:32 ^q 5:5 Luk 2:37; 18:7 ^r 5:10 Hiblu 13:2 ^s 5:13 2Tes 3:11

danjeen, tonde yoo davêel vakasin vaha vaha lak sen me-lohvu nambe sil-ame daanêel e. ¹⁴Om saawiingin nambe vехаahôôv-aso sen yoo daahen dando vехаavu dakaa-to sil lanjак vu moow ango naah, in sil gako unoopasiv-ambe ganggin silate bayêên. Ke, lambiing naambêênjo ond mem hil sen dayi yiyi bel-ate payaa-to me-le daatovu mopaatôôv in nambe daanêel yiyi pale le. ¹⁵In gêên vехаahôôv vaalu ond laluuh damind vu mopaatôôv anivasaa-to de yoo davu sapa Saalang lung la. ¹⁶Om naambe vêêh ti wii-having Yesu, tombe yite vехаahôôv-aso heey dando, ond yoo ganggin vехаahôôv-asôônju nivasа. Biing naambêênjo ond mem hil bel-ate me-le baaku nimeen in ganggin sil e. Ke, tonde sim vехаahôôv sen yoo timu nando monativak-ato ond mem hil bel-ate lalohvu nambe ganggin.

Yêêv-asote vakasin

¹⁷Yêêv-aso sen danggin hil bel-ate nivasaa-to ond ham hil bel-ate gako sil jak-ambe ham samu sil nivasа lôôt. Sa naanêel-anjo lak yêêv-aso sen yoo danêel tanasin osin davu tatekin Anutu-te vakasin langaah vu hil-ato. ¹⁸In Anutu-te vakasin neep hôôk kaapiya nambe, “Kao nawiing kul-ambe naake vanôôn wit ayuuh ame in nambe omaahonôôn daasupin nôôn-ato, ond game naanduuh kao avi be naanêelin vanôôn in yi le.” Tonde yik vakasin ango nambe, “Omaaho sen nawiing kul-ato ond lohvu nambe hil baanggo yi.” ¹⁹Tonde omaaho timu

naanêel nambe, “Yêêv tii-ja wiing vati paya,” ond game gambiing gaving omaaho timuu-juuto yite vakasin-anju le, nganjo omaaho yuuh me yaal daanêel ond mem gambiing gaving. ²⁰Tonde hil sen mondawiing va nipayaa-to ond onaanêel sil hôôk hil pin amend, in hil vaalu pin mayam lanjêênin gaving.

²¹Om Timoti, sa naanêel vu hong ak Anutu yuuh Yesu Kalisi de Anutu-te angela-so haalend naambe goo ganggin kul-anja nivasа. Tonde naambe game gatokak omaaho ti-te vakasin danggakook nivasа le, ond game naanêel pavis hôôk galompayo naambe wiing keen e, tonde yik game naanêel pavis naambe me-wiing e. Tonde game gangge naambe gate hil ti om osamu yi le, de hil ango ond onaanêel sil e, nganjo goo gambiing va pin nivalok. ²²Tonde game gako omaaho ti be onggambe namam jak yi be naatu yêêv pavis e, in naambe dukana va nipaya ond hil e daanêel ak hong gaving, om goo ganjakin hong-ambe galompayo nanjip nikaapiik.

²³De onaanum ond game naanum bel malis amu le, nganjo onaanum wain daka gaving in samu gahem-ambe gatiy nilakin sen natovu hong ak busin pin-anjaato na.

^t 5:14 1Ko 7:9 ^u 5:17 1Ko 16:18 ^v 5:18 Diu 25:4; 1Ko 9:9; Mat 10:10 ^w 5:19 2Ko 13:1

^x 5:20 Gal 2:14; Ep 5:11

²⁴Ke, hil vaalu ond silate va nipaya neep langaah pavis-ambe yalak ni nambe le daatovu nipaya nyevahaan. Nganjo hil vaalu ond silate va nipaya navun yi lôôt-ambe sim taamusin e mem tok laam langaah. ²⁵Tombe yik va nivasa sen hil dawiiing-ato ond neep langaah having nambêênja, tonde va nivasa vaalu ond me-tok laam langaah pavis e, lemu va nivasaa-jo me-le bun yi lôôt e.

Vakasin lak hil sen latu omaaho ango-te va kul-ate malis amuu-to

6 ¹Hil sen latu omaaho ango-te va kul-ate malis amuu-to ond sil oo lanjji silate yêêv-aso nivasa be gako sil ak. Le naambe sil kalêêh silate yêêv-aso lavand ond hil

vaalu le lanjji be daanêêl Anutu osin yite tanasin pale. ²Tonde hil sen latu va malis amuu-to, naambe silate yêêv-aso vaalu lawii-having Kalisi, ond sil-ame kand bu naambe silate yêêv-anju tu silate halindin bel-ate ti, om me-lanjêênin sil vu yi le. Nganjo yik yoo lambiing kul anivasa keen in dangga nambe yêêv-aso sen silate kul nahôôvu sil-ato ond sil ahondoos lawii-having Yesu be ahend naving sil.

Yiyi naawiingin nambe yiyi gako va nivasa ngeeyaata

Om yik goo tatekin vakasin-anjo vu hil-ambe gambêêl sil alund jak in lambiing nambêênjo. ³Naambe omaaho ti taahu hil hôôk tanasin vaha ango yoow, de me-wii-having yate Omaaho Bop Yesu Kalisi-te tanasin anivalok sen yaambiing va sapa Anutu kaa-to le, ⁴ond omaahôô-ju yoo natee yi lak malis amu. Me-lukook neep daka le, malis, lukook anipaya mu neep, be yoo nawiingin vakasin mahôôsin osin sil dayêês sil in vakasin, tombe nawiing-ambe sil alondpayo nipaya vu hil vaalu, osin sil danêêl sil vaha-vahaan-ambe danêêl sil pale, tombe kand navu vakasin anipaya lak halindin, ⁵tonde yoo ahend kalin mali-malis nalak busin pin. Hil sen dawiiing nambêênjo ond lundkook la paya tombe sil lavuuh vakasin keen-ato la, in kand navu nambe yaambiing va sapa Anutu ka ond yiyi gako kupak malis amu.

⁶Keen, yaambiing va sapa Anutu ka osin yahengg anivasa naambe Anutu yoo nanggin yiyi om lung, ond manyinjo yiyi hako va nivasa ngeeyaata lôôt lung la. ⁷In hôôk busin sen ataak-aso lako yiyi hatôô-to ond yame hako vati be yalaam e, tonde sim taamusin sen yaanggimbat-ato ond yame le gako vati be yanaah e, malis. ⁸Om naambe yanêeng vanôôn osin tôômb ayuuh ame nando lohvu yiyi ond yik yahengg anivasa naambe lung. ⁹In hil sen kand navu nambe sil gako kupak ngeey-ato

^y 6:1 Ep 6:5; Tit 2:9-10 ^z 6:2 Plm 16 ^a 6:3 2Ti 1:13; Gal 1:6-9 ^b 6:5 2Ti 3:8; 4:4; Tit 1:14 ^c 6:6 1Ti 4:8; Pil 4:11-12; Hiblu 13:5 ^d 6:7 Iyop 1:21; Ekl 5:15 ^e 6:8 Pro 30:8
^f 6:9 Pro 23:4; 28:22

ond palapin navu kape sil osin jaang nayiis sil, tombe sil alondpayo navu navu in va mali-malis osin va nipaya ngeeyaata sen nawiliyak omaahonôn-ato, tombe le lana mend nama valok-ate. ¹⁰ In yahengg gaving mone lôôt ond va nipaya pin-ate danggakook neep hôök, tonde hil vaalu kand nala in mone lôôt, om londpayôd-ju laandiiy sil-ambe lavuuh vakasin sen lawii-having-ato la, tombe sim nawiing-ambe londpayo nimeen lôôt.

Yiyy naapuvu kul sen metumin danggata-têênjo niwêêk lôôt

¹¹ ^hOm hong sen Anutu-te omaaho hong-ato, ond onggaluuh damim vu kupak ayuuh ame de onapak, tonde goo sapa hôök mop anivalok amu, osin gambiing va sapa Anutu ka be gambiing gaving yi niwêêk, tonde gahem gaving hil, osin ombaale niwêêk-ambe ombaaku nimeen, tonde gambiing va osin galompayo naalum melaas amu vu hil. ¹² ⁱHil sen lawii-having Kalisii-to ond silate kul

lohvu hil sen datup in kaluuh ango-sôoto. Om yik goo gatup niwêêk in nôôn anivasa sen gawii-having-ato ond mem nivasa, de onaapuvu metumin danggata-têênjo niwêêk lôôt. In Anutu teey hong in nambe omando metumin danggata, tombe yik ganêêl vakasin sen gawii-having-anjaato hôök hil ngeeyaata mend bôôy. ¹³ ^jOm sa naanêêl vu hong naambe Anutu navu metumin vu va pin, de Yesu Kalisi yoo nêêl yite dangga langaah nivasa vu Pontias Pilata, ond sa naanêêl keen jak Anutuu-ju yuuh Yesu Kalisi haalend naambe ¹⁴ goo ganggin Anutu-te vakasin anivasa, de va ningook-ame jikin ak e, tonde hil-ame daanêêl vakasin anipaya jak e. Yik goo mongganggin nivasa naambêênja lôôt-ambe na balup busin sen yate Omaaho Bop Yesu Kalisi taato yi nom langaah-ato. ¹⁵ ^kIn Anutu yoo holin Kalisi-te busin lung la, tombe busin-anju ond Anutu le biing-ambe Kalisi taato yi nom langaah. Yik Anutu sen tu ka vasa danggakook-ato ond yi timuu-ju

yoo tu niwêêk pin danggakook, tonde tu lulemakasote Omaaho Lulemak Bop, osin tu omaaho bop-asote Omaaho Bop. ¹⁶ ^lYik yi timuu-ju yoo nando danggata, me-le jimb e, yoo nando hôök melangaah bopaata lopayo, de yame aalohvu nambe yana paaviyi yi le, tonde omaaho ti me-yi me lak e, osin omaaho ti me-lohvu nambe ji me jak yi le. Ond yik Anutuu-ju banye naatu bopaata lôôt-ambe yite niwêêk nanjip danggata osin danggata. Keen.

^g 6:10 Ep 5:5 ^h 6:11 2Ti 2:22 ⁱ 6:12 1Ko 9:25-26; 1Ti 1:18; 2Ti 4:7 ^j 6:13 Jon 18:36-37; 19:11 ^k 6:15 Diu 10:17; Taato 17:14 ^l 6:16 Eks 33:20

Vakasin lak kupak dangga-so

^{17m}Onaanêêl vu hil sen silate va voon-atêênjo ngeeyaataa-to naambe sil-ame gako sil jak e, osin sil-ame lambiing gaving kupak ayuuh ame pin sen le biing paya pavis-anjo le, malis, yik sil oo lambiing gaving Anutu keen sen navu va nivasa vasa pin vu yiy in nambe yiy mando osin yakangg vasaa-to. ¹⁸De onaanêêl vu hil sen silate va ngeeyaataa-to naambe yoo lambiing kul anivasa, yik yoo lambiing kul anivasa ngeeyaata lôôt, osin sil lambiing ngaatum-ambe gatiy silate va vaalu na in landôovu hil. ¹⁹ⁿKe, lambiing naambêênjo ond sil lasupin silate nôôn anivasa ngeeyaata be le dôovu sil vu taamusin, tombe mem sil lalohvu nambe sil e mando metumin keen.

Goo ganggin gate kul sen onawiing-ato nivasa

^{20o}O Timoti, kul sen Anutu vu lukala onamam-ato ond goo ganggin nivasa, de ganoh nanye in vakasin mali-malis, osin vakasin mahôôs in sen hil vaalu danêêl paya nambe lukook anivasaa-to. ^{21p}In hil vaalu sen sil davu tatuhin nambe lalak va danggakook anii-to, ond sil lavuuh mop sen yiy naawii-having Anutuu-to la.

Yik vakasin lung laa-ja. Anutu-te samu samu naas mando gaving ham.

^m 6:17 Saam 62:10; Luk 12:20 ⁿ 6:19 Mat 6:20 ^o 6:20 2Ti 1:14; 1Ti 4:7 ^p 6:21 1Ti 1:6; 2Ti 2:18